

Imminut toquttarnermut peqqutaasinnaasut suunersut, inuiaqatigiinnilu akisussaaffik qanoq inissisimanersoq pillugu Inatsisartunut apeqquteqaat aallaavigalugu oqallisissiasatut siunnersuut

(Inatsisartunut ilaasortaq, Aqqalu C. Jerimiassen, Atassut)

Akissuteqaat

(Meeqqanut, Inuusuttunut, Inatsisit Atuutsinneqarnerannut Naligiissitaanermullu Naalakkersuisoq)

Siullermeerneqarnera

Inatsisartunut ilaasortaq Aqqalu C. Jeremiassen qujanaq sammisaq pingaarutilik manna oqallisigiumagakku.

Imminut toqunnerit qanorluunniit ikitsigisut amerlavallaarput.

Imminut toquttarnermi kisitsisit annertuallaarjussuartut ikilisinnissaannut, imminut toquttarnermi pissutaasartut pillugit ilisimasat aalajangiisuulluinnartuusut, Naalakkersuisut isumaqatigilluinnarpaat. Iisimatusarnerup nassaassaareersup atornissaa, peqatigisaanillu ilisimasanik nutaanik aallernissaq pingaaruteqarpoq. Nunatsinni Innuttaasut Peqqissusiannik Iisimatusarfik illersuutaasinnaasut aarlerinaataasinnaasullu pillugit, imminut toquttarnermik pitsaaliuineq pillugu, imigassaq imminullu toquttarnek pillugit kiisalu 15-iniit 34-inut ukiullit akornanni eqqarsartaatsikkut peqqissusaat pillugit paasissutissarpassuarnik peqareerpoq. Suliniutinik nutaanik nalilersuisoqaraangat pilersitsisoqaraangallu, ilisimasaq taanna atortarparput. Peqatigisaanik ukiumut ataasiaannaanngitsoq, ingerlaavartumilli, ilisimasanik nutarterisarnissarput pingaaruteqarpoq. Taamaattumik Naalakkersuisut Nunatsinni Innuttaasut Peqqissusiannik Iisimatusarfik suleqatigalugu, suliniummik imminut toquttarnermik imminullu toqoriartarnermik ingerlaavartumik nakkutiginnissinnaasumik massakkut sulissuteqarput. Iisimasat piviusuminngaanneernerusut atorlugit suliniutit sukkanerusumik naleqqussarneqarsinnaallutillu pisariaqartitsinerpaasunut siunnerfilerneqarsinnaapput, taannalu sulianut aallunneqartunut pingaaruteqartutut suliarineqarluni ingerlalerpoq, ingerlajuarnissaalu qulakkeerniarneqarluni.

Ullumikkut inunnut ajornartoortunut inunnut sammititanik arlalinnik neqerooruteqarpoq, soorlu ilaatigut QAMANI - Imminut toqunnissamik pinaveersaartitsineq pillugu periusissiaq 2023-2028, Inulerivik, TUSAANNGA aamma Qamani app-i. Neqeroorutilli taakkuinnaasinnaanngillat. Naalakkersuisut aaqqissuussaasumik pitsaaliuinerup pitsanngorsarneqarnissaa aamma pisariaqartutut isigaat.

Imminut toquttarnermik pitsaaliuineq kinguneqarluassappat siunissamullu ungasinnerusumut atuulluni aammalu neqeroorutit inunnut sammititat sunniuteqassappata, inuiaqatigiittut nassuerutigisariaqarparput akisussaaffeqarluta maligassiuisussaallutalu. Inuup ataatsip qinigaatut isikkoqarsinnaasut, akuttunngitsumik inuuniarnermi atugarisamik inuiaqatigiillu aaqqissuussaananik tunngaveqartarput. Eqqarsartaatsikkut peqqissutsimut suliniutinik pitsanngorsaanikkut, nutaamik imigassamut politikiliornikkut, innuttaasunut inissianik qulakkeerinninnikkut, meeqqat inuusuttullu ineriartorfigisinnaasaannik toqqissisimasunik sinaakkusiornikkut aamma nakuusertarnerit, atonerluisarnerit sakkortuumillu misigisaqarnernit kingunerlutsitsinerit paquminarunnaarsinnerisigut, inooriaatsitsinnik

ataqatigiilluta tapersersoqatigiillutalu ileqqorissaarfigeqatigiinnikkullu, inuiaqatigiit peqqinnerusut, akisussaaqatigiinnerulernerullu tungaanut ingerlaassaagut.

Peqatigisaanillu aalajangiisuvoq paaseqatigiiffiusumik, ammasumik isumassuisumillu inuiaqatigiinnik pilersitsinissaq. Artornartut oqaloqatigiissutigisinnaasariaqarpagut - ataatsimoorluta.

Inuttut ajornartorsiutit soorlu nakuusertarnej, imigassamik atornerluineq, kannguttaatsuliornej, sumiginnaaneq, annaasaqarnej aamma kanngusunnej inuiaqatigiinni ataatsimoorluta qaangerniarsinnaanerusariaqarpagut tassaniippummi aaqqiissutissat nassaarisinnaasagut. Pitsaasumik qinigassaqarfiusumik aamma kialuunniit kisimiiffiginngisaanik, inuiaqatigiinnik pilersitsiartuaarnissaq anguniagaavoq.

Tamatumunnga piffissamut sivisuumut aaqqissuussaasumillu pitsaaliuineq pisariaqarpoq. Ilaqutariittut inuunerup ataqatigiittuarnissaanik pingaartitsineq qitiutissavarput. Angajoqqaat angajoqqaajunermi, kiisalu inuttut attaveqaatigisartakkanut ataatsimoornernullu tunngatillugu tapersorneqarnissamik, utoqqartattalu atorfissaqarteqisatta suleqatigilluarnisigut, immikkut pisariaqartitsisut nukittorsassavagut. Peqatigisaanillu oqaatsivut, piorsarsimassuserput, ileqquvut naleqartitavullu kinaassutsitsinnik sorlaqarnitsinnillu pilersitsisut paarissavagut. Tamanilli pingaarnertut, inooriaatsit aserortersit aamma misigisapiluit, sulii ilaqutariinnik najugaqarfinnillu sunnerneqaataasut qaangerniassavagut.

Suliniut sunaluunniit kisimiilluni atorsinnaangilaq. Kisianni ataatsimoorluta annertuumik pitsaaliuisinnaavugut.

Taamaattumik Naalackersuisut neqeroorutit nukittuut inunnut sammititat, piffissamullu sivisuumut aaqqissuussaasumik pitsaaliuinerit, kinguaariinnut aggersunut Nunatsinni toqqissisimanerusumik akiuussinnaanerusumillu pilersitsisussat, sulissutigalugit ingerlatiinnarniarpaat.

Naalackersuisuniit oqallisissiaq pingaarutilik oqaaseqarfigisinnaagatsigu qujavugut.